

瑜伽師地論本地分菩薩地真實義品講義十六(2013)

一、由四緣故悲名大悲〔瑜伽卷44〕

由四緣故悲名大悲：

- 一、緣甚深微細難了諸有情苦為境生故。
- 二、於長時積習成故：謂諸菩薩經於無量百千大劫積習所成。
- 三、於所緣猛利作意而發起故：謂諸菩薩由是作意悲所執持，為息有情眾苦因緣尚能棄捨百千身命，況一身命及以資財。於一切種治罰大苦，為諸有情悉能堪忍。
- 四、極清淨故：謂諸菩薩已到究竟菩薩清淨；若諸如來已到佛地如來清淨。

二、菩薩利益安樂自利利他〔瑜伽卷35〕

一、利益種類自利利他

云何菩薩利益種類自利利他？

略說應知有五種相：一、無罪相，二、攝受相，三、此世相，四、他世相，五、寂滅相。

●一、無罪相

若諸菩薩所有自能若少若多攝受善法、增長善法；或復令他若少若多攝受善法、增長善法，勸勉、調伏、安置、建立；是名菩薩利益種類自利利他無有罪相。

●二、攝受相

若諸菩薩能引所有若自若他無染汙樂、或眾具樂、或住定樂，是名菩薩利益種類自利利他能攝受相。

●三、此世相，四、他世相

若諸菩薩自利利他：或有此世能為利益，非於他世；或有他世能為利益，非於此世；或有此世及於他世俱為利益；或有此世及於他世俱非利益。

如是四種自利利他，於四法受，隨其次第，如應當知。

云何名為四種法受？或有法受，現在受樂，於當來世受苦異熟；或有法受，

現在受苦，於當來世受樂異熟；或有法受，現在受樂，於當來世受樂異熟；或有法受，現在受苦，於當來世受苦異熟。

此四廣辯，如經應知。是名菩薩利益種類自利利他此他世相。

●五、寂滅相

若諸菩薩所有涅槃及得涅槃世出世間涅槃分法，是名菩薩利益種類自利利他寂滅略相。當知此相望餘一切，無上最勝。

二、安樂種類自利利他

云何菩薩安樂種類自利利他？

略說應知五樂所攝。何等五樂？一者、因樂，二者、受樂，三者、苦對治樂，四者、受斷樂，五者、無惱害樂。

1. 五樂體性

●一、因樂：言因樂者，謂二樂品諸根境界，若此為因順樂受觸，若諸所有現法當來可愛果業，如是一切總攝為一，名為因樂。除此更無若過若增。

●二、受樂：言受樂者，謂待苦息，由前所說因樂所攝三因緣故，有能攝益身心受生，名為受樂。

略說此樂復有二種：一者、有漏，二者、無漏。

無漏樂者，學無學樂。

有漏樂者，欲、色、無色三界繫樂。又此一切三界繫樂，隨其所應六處別故有其六種：謂眼觸所生，乃至意觸所生。如是六種復攝為二：一者、身樂，二者、心樂。五識相應，名為身樂；意識相應，名為心樂。

●三、苦對治樂：苦對治樂者，謂因寒熱饑渴等事，生起非一眾多品類種種苦受，由能對治息除寒熱饑渴等苦，即於如是苦息滅時，生起樂覺，是則名為苦對治樂。

●四、受斷樂：滅想受定，名受斷樂。

●五、無惱害樂：無惱害樂，應知略說復有四種：一、出離樂；二、遠離樂；三、寂靜樂；四、三菩提樂。

- 一、出離樂：正信捨家，趣於非家，解脫樊籠居家迫迮種種大苦，名出離樂。
- 二、遠離樂：斷除諸欲惡不善法，證初靜慮離生喜樂，名遠離樂。
- 三、寂靜樂：第二靜慮已上諸定，尋伺止息，名寂靜樂。
- 四、三菩提樂：一切煩惱畢竟離繫，於所知事如實等覺，此樂名為三菩提樂。

2.釋五樂得名

- 一、因樂：此中因樂，是樂因故，說名為樂；非自性故。
- 二、受樂：此中受樂，樂自性故，說名為樂；非樂因故。
- 三、苦對治樂：苦對治樂，息眾苦故、遣眾苦故，說名為樂；非樂因故、非自性故。
- 四、受斷樂：其受斷樂，非樂因故、非自性故，亦非息遣種種苦故，說名為樂。然依勝義，諸所有受皆悉是苦，住滅定時，此勝義苦暫時寂靜，故名為樂。
- 五、無惱害樂：無惱害樂所攝最後三菩提樂，由當來世此勝義苦永寂滅故；於現法中，附在所依諸煩惱品一切羸重，永寂滅故，說名為樂。諸餘所有無惱害樂，於最後樂能隨順故，是彼分故，能引彼故，當知亦名無惱害樂。

三、思擇所應給與道理

此中菩薩念與眾生有利益品所有安樂，終不念與無利益品所有安樂。

菩薩此無利益品所有安樂，以無倒慧如實了知；勸諸眾生令悉捨離，隨力所能方便 剝奪。

若苦所隨有利益事，眾生於此雖無樂欲，菩薩依止善權方便，設兼憂苦，應授與之。若樂所隨無利益事，眾生於此雖有樂欲，菩薩依止善權方便，設兼喜樂，應剝奪之。何以故？當知如是善權方便，與兼憂苦有利益事，奪兼喜樂無利益事，令彼眾生決定於後得安樂故。

是故菩薩於諸眾生若樂利益，當知義意即樂安樂；於諸眾生若與利益，當知義意即與安樂。所以者何？利益如因，安樂如果。是故當知，於諸眾生若與

利益，必與安樂。

當知所有現法當來可愛果業所攝因樂、苦對治樂，及受斷樂、無惱害樂，菩薩於此不應思量，於諸眾生一向授與，以能饒益及無罪故。

於彼受樂及根塵觸所攝因樂，若能生染，若性是染，有罪無益，非所宜者，於諸眾生不應授與。若不生染，若性非染，無罪有益，是所宜者，於諸眾生即應授與。

菩薩於此隨自力能，亦應如是修行受學。

當知是名菩薩利益安樂種類自利利他。除此無有若過若增。